

**“SCUELE DI AVOST”****Un centenâr di docents di furlan impegnâts te seconde edizion de  
Summer School sostignude de ARLeF e de Regjon**

E je stade screade vuê la seconde edizion de “Scuele di Avost”, il percors formatîf estîf nassût intal ambit di Docuscuele, il centri regjonâl di riferiment pe educazion in lenghe furlane finanziât de ARLeF - Agenzie Regjonâl pe Lenghe Furlane e de Regjon Autonome Friûl-Vignesie Julie, e coordinât de Societât Filologjiche Furlane. Obietîf di Docuscuele al è chel di meti in rêl progjets e competencis e di creâ occasions di confront e di insiorament pai insegnants impegnâts inte introduzion de marilenghe intai programs formatîfs dai istitûts dal teritori.

La trê dîs estive – che si sierarà miercus ai 29 di Avost – si fâs a Davâr in localitât Aplis, là che si viodin impegnâts sui bancs plui o mancun un centenâr di insegnants di lenghe furlane. I lavôrs a son stâts vierts vuê a buinore dal sindic di Davâr Mara Beorchia, di William Cisilino, diretôr de ARLeF e di Federico Vicario, president de Societât Filologjiche Furlane.

“Scuele di Avost - al à sclarît William Cisilino, diretôr de ARLeF - si torne a confermâ tant che une tape cetant impuartante di Docuscuele, il Centri regjonâl di documentazion, ricercje e sperimentazion didattiche su la lenghe furlane, che al è il risultât di une buine colaborazion tra ARLeF, Regjon e Filologjiche. Come che al è sucedût te prime edizion, il numar alt di participants al dimostre che chest cors al rapresente une rispueste concrete ae domande dai docents e al pues jessi un model di slargjâ ancjemò di plui”.

Il program dal cors intensîf, che al è increditât daûr des liniis vuide MIUR 2016-2019, al previôt leziions frontâls cun docents universitaris e al è articolât in aprofondiments di linguistiche, leterature e didattiche in/de lenghe furlane, e in ativitâts di laboratori che a permetin di cognossi e di sperimentâ metodologjii inovativis che a cambiin daûr des diviersis etâts dai students.

*Udin, ai 27 di Avost dal 2018*

**INFORMAZIONS PE STAMPE - INFORMAZIONI PER LA STAMPA**

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: arlef@caltpr.it**  
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<